

هزيل السحاب

بخ الشتا

كل اللي باقي من الدفا

فاختل في الشمس الشعاع

و انساب هزيل زى السحاب

و ف غفلة من ضي القمر

احتل برد المستحيل

كل الزمان و الأمكنه

والأرض ماجت بالسواد

قلبي الصغير مااحتملش المسأله

فخطفت أشلاء الشعاع

و شوية من بحر الدفا

و اخترت زاويه

م الزوايا الممكنه

وركنت ع الجدار
و ايديه شابكه ف بعض
وقريت فواتح سورة الإسراء
فانهارت على عتبة شاببيكي الشيطان
واختفى
لفيت حبال الفرحة حوالين الكتاف
متعلقه بين القلوب والأورده
ولقيت دموعي اتسرسبت
من بين جفوني و كفنت
كل اللي فات من الذكريات
والأرض حواليه ابتدت
ترمي الدفا
على قرص شمس المستحيل
والقلب بالنشوة ارتوى